

Yech galo kwa'n mixë'l San Pab lo rë men che'n Jesukrist, xa' nzho yezh Tesalónica

Men che'n Jesukrist, ¿ma go, chi wen ka go?

1 ¹Na Pab, kun Silvan no Timoteo; kixë'l no yech re' lo rë go, xa' nak men che'n Xuz be Dios no men che'n Jesukrist, rë go xa' nzho yezh Tesalónica. Kina'b no lo Xuz be Dios, kun lo Señor Jesukrist, par ya go wen, mbaino par zilita' zi go chul dizde le'n laxto' go.

Rë plo nzhon men, walika ñila go widi'zh che'n Dios

²Zilita' niza' no xkix lo Dios por rë go, mbaino nina'b no lo Dios gaknu Dios rë go. ³Kad or niza' no xkix lo Xuz be Dios, nize't no go lo Me por dox nile' go rë kwa'n nzhakla Me por ñila go Me, mbaino por nzhaknu go rë men por nazhi' go bixa'. No nu or nizakzi go por nak go men che'n Me, nixek go por nane go, lë' Señor Jesukrist mer la yë'd. ⁴Rë go wech no bizan, dox nazhi' Dios go, nane no, Dios ngule go nak go men che'n Me. ⁵Nane no Dios ngule go porke or milu' no widi'zh nazhon che'n Dios lo go, nu ska Sprit che'n Dios mile' kwa'n nazhon xid go, no par une go xmod nak no, yent kwan che'n go nguzen no; no mile' par ban go wen namás.

⁶No yub ka go nguziyël ban nela xmod miban no xid go, no nela xmod miban Señor Jesukrist, porke or ngwayila go widi'zh nazhon kwa'n milu' no lo go, por Sprit che'n Dios, mizak laxto' go mile'i, ter mizakzi más rë men go. ⁷Sa' miban

go lo rē men par milu' go xmod ñal ban más rē men che'n Jesukrist, xa' nzho rē yezh kwa'n ña'n lazh men Macedonia, kun lazh men Acaya. ⁸Por go, mire'ch widi'zh che'n Dios rē plo, gat lē't nab tsa lazh men Macedonia kun lazh men Acaya. Rē plo ñēt, dox ñila go widi'zh che'n Jesukrist; kuze', gat naki'ntra' di'zh no go lo rē men, rē men nzhon xmod naban go, ⁹porke rē men nidi'zh, lē' go mile' wen kun no or ngwatsi' no ma go, no tatu mila' go tu lad rē dios winab che'n go, par le' go kwa'n nzhakla Dios, Me walika naban mbaino Me gaka nak Dios. ¹⁰Nu nidi'zh bixa' lē' go kimbēz, zhin zhē yubre Jesukrist yizhyuo; Jesukrist, Me mile' Dios nguruban, mbaino Me ngulo' be lo yalzi nazhe'b kwa'n xē'l Dios lo rē men yizhyuo re'.

Zhi'n nazhon kwa'n mile' Pab yezh Tesalónica

2 ¹Rē go wech no bizan, men che'n Jesukrist, lē' go nane ka, gat lē't dimbald mbi'dtsi' no ma go. ²No nane ka go, or naga yi'd no plo nzho go, nakap mile' rē men yezh Filipos lo no, no ngokla ngwa midi'zh bixa' lo no; per ngoknu Dios no, nangazhebt no or milu' no widi'zh nazhon che'n Dios lo go, ³porke rē kwa'n midi'zh no lo go ba', gat nakte kwa'n michao' yek no, par tsinu no men namás, porke yent cho nzhakla no kide no, ⁴per Dios mizo no, mika'b Me di'zh no lo rē men widi'zh nazhon che'n Me, kuze' nikwa'n no di'zh no kwa'n ño laxto' Dios, gat lē't kwa'n ño laxto' mene, porke Dios nzhakbe' kwa'n nzho laxto' no. ⁵Lē' go nane ka, nangadi'zht no lo go rē widi'zh chul namás par ngala no yek go, no ni nangakide no go par ngaka' no rē che'n go; Dios nane nambe laxto' no lo rē kure', ⁶porke lalta' gat nikwa'nt no wi' men wen lo no, no ni gat nzhakla no ngale' go sa' kun no. No ter ñal ka ngana'b no lo go, ngaxē'n go no, por nak no apost che'n Jesukrist, per nangale't noi, ⁷lē'la nkina no go nela xmod nile' tu una' kun xmē'do' xa' or nikina xa' mē'd. ⁸Se' nile' no por go, nizak laxto' no, gat lē't nab por midi'zh no widi'zh nazhon che'n Dios lo go, haxta nu miye laxto' no ngat no por go por dox nazhi' no go. ⁹Rē go wech no bizan, lē' go nitsila ka, dox vid nded no or midi'zh no widi'zh nazhon che'n Dios lo go, mbaino zhē-yē'le nkē no zhi'n par ndao no par nangazo no zhi'n lo ni tu go.

¹⁰Go, no Dios nane, nambe nkizë xid go, nangale't no ni tu kwa'n gat ñal, no ni tu go nagakt gab kwan tu kwa'n nak no xid go. ¹¹No nane go, mile' no kun kad go nela xmod nile' tu xuz men kun rë xmë'd xa'. ¹²Se' midizhnu no go, mbaino mitsiro'b no la go lo rë kwa'n nguzak go, mbaino ne no lo go nela xmod mile' Dios mandad no, ñal ban go nela xmod nzhakla Dios, Me ngurezh go par yo go plo nzho yalnazhon che'n Dios no plo nile' Me mandad.

¹³Kuze' zilita' niza' no xkix lo Dios, porke or mbin go widi'zh che'n Dios kwa'n mika'b Me par midizh noi lo go, ngwayila goi, porke milibe' go widi'zh che'n Diose, gat lë't kwa'n michao' yek mene, porke xtu mod niban men, xa' ñila widi'zh nazhon re'. ¹⁴Biwi'ule wech no bizan, men che'n Jesukrist; nela mizakzi rë men lazh go go, se'ska ngurukë rë men Israel tich rë men che'n Jesukrist, xa' nzho lazh men Judea. ¹⁵No lë' rë men Israel re' mbit bixa' yub Señor Jesukrist, no lë'ga' bixa' mbit rë profet, rë xa' midizh por Dios nzhala, mbaino ngulutin bixa' no lazh bixa'. No ni gat nile' bixa' kwa'n nzhakla Dios, lë'la nakap bixa' lo rë men. ¹⁶No or nzhakla no di'zh no widi'zh nazhon che'n Dios lo rë men, rë xa' gat lë't men Israel, par nu bixa' ro' lo rë kwa'n nazhe'b nzho bixa', per nala't rë men Israel le' noi. Kuze', guzhe miza la rë kwa'n nzë'b xki bixa' lo Dios, mbaino guzhe zakzi Dios bixa'.

Nzhakla Pab yëk xa' yezh Tesalónica

¹⁷Rë go wech no bizan, ter gat nzot no lo go nal re' por tu tiemp, per zilita' nitsila no go, no dox nzhakla no yi'dtswi' no ma go xtu wëlt. ¹⁸Nayax wëlt mile' no xigab re'; na Pab, nu da nayax wëlt ngoklan ngayala ba', per nangala't Mizhab. ¹⁹Gat por go la gal no kwa'n kinu Señor Jesukrist ka' no, no por go nizak laxto' no, mbaino nizi no tsak no lo Señor Jesukrist por xmod miro'b go lo rë che'n Me. Kuze', or kube' Señor Jesukrist rë kwa'n mile' no, por go ya'n no wen lo Me. ²⁰Walikai, por go más wen nine Dios no, mbaino nile' go nizak laxto' no.

3 ¹Kuze', por naxektra' no nikë laxto' no go, nzhakla no ne no ma go, kuze' mile' no xigab yent kwa'n lë'i ya'n nab no yezh Atenas re'. ²Orze' mixë'l no Timoteo, xa' nak tu wech be por Jesukrist, par yi'dtsi' xa' ma go, por nak xa' tu

men xa' nzhaknu no nidi'zh no lo rē men widi'zh nazhon che'n Jesukrist. Mbi'd xa' ba' par mile' xa' zo go wen lo rē che'n Dios, no par midi'zhnu xa' go par naya'lt laxto' go widi'zh nazhon che'n Dios kwa'n ngwayila go, ³nes par ni tu go nala't widi'zh che'n Dios por rē kwa'n nile' rē men ba'; lē' go nane ka, lē' be naki'n ded lo rē kwa'n nilinu men be, ⁴porke or stubi nzo no xid go, nayax wēlt midi'zh no lo go, nzhazhin la zakzi men be, no se' ka ngoke nela xmod ne no lo go. ⁵No na, por ya naxektra' da nikē laxto'n go, mixēla Timoteo lo go par ne xa', nabei chi se'gaka ñila go widi'zh nazhon che'n Dios kwa'n ngwayila go. Nizheb da, napa' mikide Mizhab go lo kwa'n gat lē', orze' yent cho kwent nguzakzi no por go.

⁶Per nal, or nguiubre Timoteo lo no di mbi'dtsi' xa' ma go, mile' xa' gax ga' ñē'd laxto' no, mbin no lē' go se'gaka ñila widi'zh nazhon che'n Dios, mbaino dox nazhi' go guchin go, men che'n Jesukrist. No nu ne xa' lo no, nu go nikē laxto' no nela no ga', mbaino dox nzhakla go, ne go no, nela xmod nizi no kun go ga'. ⁷Kuze', wecha no bizana, men che'n Jesukrist, ter dox kizakzi no por rē kwa'n kizak no, per gax ga' ñē'd laxto' no por se'gaka ñila go widi'zh nazhon che'n Dios. ⁸No por mbin no, lē' go se'gaka naban lo rē che'n Dios, nizak no nela tu men mer la gat per unka' la xa', ⁹haxta nanetra' no xmod za' no xkix lo Dios por rē kwa'n kile' Me por go, no por go nizak laxto' no lo Dios. ¹⁰Zhē-yē'le, dox nina'b no lo Dios par gaknu Me no, yi'dtsi' no ma go, nes par ne go rē kwa'n, kwa'n nzhak jwalt lo kwa'n ñila go Dios.

¹¹Kina'ba lo Xuz be Dios, no lo Señor Jesús, par gaknu bi Me no, gak yi'dtsi' no ma go. ¹²No nu kina'ba lo Señor Jesukrist par gaknu Me go, más yar kwa'n nazhi' go men che'n Jesukrist, tu go kun xtu go, no kun rē men, nela xmod nazhi' no go ga'. ¹³Mbaino kina'ba lo Jesukrist, Me nile' mandad be, gaknu Me go, le' go kwa'n ño laxto' Dios, nes par ban go nambe lo rē kwa'n gat lē', par yent cho gak gab ni tu kwa'n gat lē' nak go dilant lo Xuz be Dios, or yubre Jesukrist, Me nile' mandad be, kun rē ganj che'n Me.

Ñal ban be nela xmod nzhakla Dios

4 ¹No nal, xtu kwa'n. Rē go wech no bizan, milu' no lo go, xmod nzhakla Dios ban go, no se'gaka kile' go. Per

nal dox kina'b no lo go, kika'b no, bile' go se'gaka, biban go nela xmod nzhakla Dios, nela xmod milu' no lo go, por nak go men che'n Jesukrist. ²Lè' go nane ka, mitse'd no go rē widi'zh kwa'n mika'b Señor Jesukrist lo no, ³porke nzhakla Dios ban go nambe lo Me par lu', nak go nab tsa par lè' Me; kure' nak, nabant go kun men gat lè' tsa' go. ⁴Kad go ñal ka'n lo kwa'n nzhakla kwerp che'n go, par ban go nambe lo Dios, orze' lè' men di'zh nazhon Dios. ⁵Nagakt go nela rē men xa' naban kun chola men, porke sa' nak rē men, nela xa nile' rē men xa' gat nilibe't Me walipa' Dios. ⁶Nzhakla Dios, par nayot ni tu go xa' nile' kwa'n gat lè', no xa' nikide wech, rē xa' nile' rē kure'. Lè' da ni la lo go, lè' Jesukrist Me nile' mandad be, zakzi rē men xa' nile' rē kure', ⁷porke ngurezh Dios be, gat lè't par ban be lo kwa'n gat lè'i; lè' Dios nzhakla ban be nab tsa par lè' Me. ⁸Kuze', men xa' nile' naya' lo widi'zh re', gat lè't lo men nile' xa'i; lo Diose, Me mine' Sprit che'n par yo laxto' be.

⁹No xtu kwa'n ne no lo go, gat naki'ntra' zobni' no más widi'zh par ne go xmod chizhi' go wech go, porke yub Dios mitse'd go chizhi' go wech go. ¹⁰Per ter nazhi' ka go rē men che'n Jesukrist, xa' nzho dub lazh men Macedonia, dox kina'b no lo rē go wech no bizan men che'n Jesukrist, par más yar kwa'n nazhi' go tu go kun xtu go. ¹¹Bile' pa' go par wi' go nab tsa lo rē kwa'n nak che'n go; nala'cht go kwa'n nak che'n xtu men, gukē go zhi'n par gao go, nela xmod mitse'd no go, ¹²par yēt go wen xid rē men xa' gat ñilat widi'zh che'n Dios, porke yent cho lo nina'b go ni tu kwa'n par ban go.

Or yubre Señor Jesukrist xtu wèlt

¹³Rē go wech no bizan, men che'n Jesukrist, nzhakla no ne go xmod gak kun rē men che'n Jesukrist, rē xa' ngut la, par nawint laxto' go nela rē xa' nanet tuli chi ziruban men ngut. ¹⁴Per be, por ñila be ngut Jesukrist no nguruban Me, se'ska ñal yila be, lè' Jesukrist le' ruban rē mengut, rē xa' nak men che'n Me, par wei' Me bixa' lo yibē'. ¹⁵Kuze', nela xmod mile' Señor Jesukrist mandad, kidi'zh no lo go. Or yubre Jesukrist, galo laka rē xa' nzho le'n ba' chē'l lo Me lo yibē'; orze' nzha rē be, xa' se'gaka naban yizhyuo re'. ¹⁶Lè' yub Jesukrist lali dizde lo yibē' no le' Me mandad ruban rē men che'n Me xa' ngut la, mbaino ganj xa' más nile' mandad naye di'zh ganj, no xtu ganj kwe'zh trompet che'n

Dios; orze' rē men che'n Jesukrist, xa' ngut la, ruban. ¹⁷Orze'se, rē be xa' se'gaka naban yizhyuo re', lē' be kili par zhē'l be le'n xkao kun más rē xa' galo laka nkili, nes par ze', tutsa zhē'l rē be kun lē' Señor Jesukrist; orze' par dubta' yo be kun lē' Me. ¹⁸Por rē kure', bitsiro'b go la wech go (bile' go, nayat laxto' wech go), tu go kun xtu go, lo rē kwa'n nizak go.

5 ¹Nal, wech no bizan, men che'n Jesukrist, gat naki'ntra' zob no lo yech re', pok gak rē kure', cho mbēo'we o cho zhēi; ²lē' go nzhon la, yent cho nane or zhin zhē yubre Jesukrist; lē'i gak nela tu yē'l or ño tu wa'n lizh men ga'. ³Gab rē men yizhyuo: “Ni tu xigab, chul nzhin rē be; yent por kwan le' be xigab”, per ÿdi!, zhin rē kwa'n lo'x bixa', nela yalne che'n tu una' gal xin; yent cho ka'n lo rē kwa'n lo'x rē men re'. ⁴Per go, wech no bizan, men che'n Jesukrist; gat nut go nzhin lo nakao; lē' go nane la rē kure'. Kuze', nazhint zhē re' lo go nela tu wa'n ga', ⁵porke rē be xa' nak men che'n Jesukrist, nak be men nzo lo biani che'n ngubizh ga', gat nakt be nela rē men nzo lo nakao che'n yē'l ga'. ⁶Kuze' la, naki'n gak natsin be; nagakt be nela más rē men xa' gat ñat laxto', nela tu men naxnaa ga'. ⁷Lē' go nane ka, más nix nzha' men yē'l, no yent cho kwent niza' bixa' rē kwa'n nzhak; mbaino rē xa' nzhoi, más nizuzh bixa' yē'l, no se'ska gat niza't bixa' kwent rē kwa'n nzhak. ⁸Per be, men che'n Dios, gat nile't be rē kwa'n nzhak lo nakao, kuze' ñal gak natsin be lo rē kwa'n nzhak. Nela xmod nile' rē sondad lo dil, nikina bixa' bixa' kun rē y'i'b kwa'n kinu bixa', se'ska naki'n kina be be lo rē kwa'n gat lē': Dubta' yila be widi'zh nazhon che'n Dios, no nazhi' be wech be, men che'n Jesukrist, mbaino wanei cho men; no naki'n tsila be, lē' Dios kubchi be lo rē kwa'n zakzi Dios rē men xa' gat nzhont ro' Dios. Par be, kure' nak nela tu y'i'b ga' par kina be be, ⁹porke nangagot Dios be par lox be lo yalzi; lē' Dios ngulo be par ban be dubta' por rē kwa'n mile' Señor Jesukrist por be. ¹⁰Ngut Me por be; kuze', ter naban be o ngut be yizhyuo re', per lē' be ban par dubta' kun lē' Me. ¹¹Nal ñal bitsiro'b go la wech go (bile' go, nayat laxto' wech go), tu go kun xtu go, mbaino bile' go, ro'b tu go kun xtu go lo rē che'n Dios, nela xa kile' ka go.

Lult kwa'n midi'zh Pab

¹²Rē go wech no bizan, men che'n Jesukrist, dox kina'b no lo go, gop go kwent rē xa' dox nile' xigab por go, nitse'd

bixa' go ban go nela xmod nzhakla Señor Jesukrist. ¹³Biwi' go wen lo bixa', no bichizhi' go bixa' por rē kwa'n nile' bixa' por go; no chul guzhin go tu go kun xtu go. ¹⁴No kina'b no lo rē go, men che'n Jesukrist; xa' nicha'b kē zhi'n xid go, bilu'zh go bixa' (biza' go kunsej bixa'); no rē xa' nzhakla ro' ya' lo widi'zh che'n Dios, bitsiro'b go laxto' xa'; mbaino bixek go lo rē men nakap lo go. ¹⁵Bikina go go, nayat go lal kun men nile' nakap lo go; más wen zilita' bile' pa' go par le' go kwa'n wen tu go kun xtu go, no wanei kun cho xtu men. ¹⁶Zilita' bizak laxto' go, ¹⁷no dubta' nayazhat go na'b go lo Dios. ¹⁸Lo rē kwa'n nizak go, biza' go xkix lo Dios; kure' nzhakla Dios por nak go men che'n Jesukrist. ¹⁹Nale't go naya' lo rē kwa'n nazhon nile' Sprit che'n Dios xid go, ²⁰no ni nayi'd yek go, le' go xigab, ka mbël rē widi'zh kwa'n nidi'zh men por Sprit che'n Dios. ²¹No or gon go rē widi'zh re', gurël goi, no chi che'n Diose, wayila goi; ²²no yubchi go lo rē kwa'n gat lē'.

²³Kina'ba lo yub Dios, Me nile', nizi rē men che'n Me chul, dizde le'n laxto' bixa', par tsumbe Me laxto' go lo rē kwa'n, no alm che'n go, mbaino kwerp che'n go, par nane Señor Jesukrist ni tu kwan gat lē' nak go or yubre Me. ²⁴Dios ngule go par gak go tu ben men par lē'tsa Me. Por nile' Me rē kwa'n nila' Me di'zh, nanen, lē' Me le' rē kwa'n kina'ba lo Me por go.

Tu widi'zh wen par rē go, men che'n Jesukrist

²⁵Rē go wech no bizan, men che'n Jesukrist, bina'b go lo Dios par gaknu Me no. ²⁶Guzen go ya' rē wech be no bizan be, men che'n Jesukrist xa' nzho ba', mbaino uni' go lo bixa' kun dub laxto' go. ²⁷Dilant lo Señor Jesukrist, kika'ba lo rē go, go'l go yech re' lo rē men che'n Jesukrist xa' nzho ba'. ²⁸Lē' Señor Jesukrist gaknu rē go. Sa' gake.